

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

3. Mendacium simile vento.

[urn:nbn:de:hbz:466:1-68709](#)

mia relatum. Excepunt tam generi, quam tuxores, attentis auribus nummorum strepitum, sensique promissa. Unde spe lactati mutua amulatione certare, & omni officiorum genere copiosum parentem prosequi. Eo mortuo, primum omnium fuit, ut ad cistam accurrerent, unde nummos depromptos putabant, & in praedam melioris hereditatis involarent. Dum aperiunt, dum avidos oculos, & manus adjiciunt, ecce tibi, reperiunt arcam lapidibus & arena plenam, una cum nodoso stipite, cui inscriptum: *Quod pietas non potuit, avaritia extorsit.* Sic altus avaritiam plexit, & quod Vlyssis sociis contigit, vacuo hiatu vultures delusit. Joan. Paulus in Joco-seriis & Joan. Major in spec. Exempl. V. avaritia.

III. (d) Sed non fauces modo pecuniae aviditate distentæ paescunt, & pascuntur à ventis; utres isti ventosi etiam ad mendacioquos pertinent, qui quot verba emittunt, tot fumos & ventos exhalant & exspirant. De quibus Salomon Proverb. c. 10. *Qui nititur mendacis, hic pascit ventos.* Recte mendacium comparatur vento. 1. Quia sicut ventus est fluidus, levus & evanidus; sic mendacium instar fumi & venti dissipatur & evanescit. Quae decipiunt, inquit Seneca, epistol. 8. nihil habent solidi: tenue est mendacium, si diligenter inspexeris. 2. Ventus non haeret, sed celerrime pertransit; sic mendacium. Eleganter Plutarch. lib. 2. de vita solitar. Simulata, inquit, illico, patescunt; fucus sudore diluitur, & argutum etiam mendacium vero cedit, coramque pressius intuente, diaphanum est. 3. Ex uno vento generantur plures: iisque inter se contrarii, & confligentes; ex uno mendacio prodit alterum, tertium, quartum, inter se colluctantia. 4. Ventus licet tenuis & inanis, utres tamen & folles distendit. Idem in mendaciis cernitur: tumescunt, donec rumpantur. 5. Ventus in canum inflat fistulas: mendaces sunt velut æs sonans, & cymbalum tintiens. 6. Ventus, quamvis subtilis, arbores tamen, domos & turres sternit ac evertit. Mendacium saepè inter reges ac populos bella inter necina concitat, ac urbes, regna & imperia vastat. 7. Aëolus ventos Vlyssi dono dedit. Finni & Lapones septentrionales populi, si fides Ola lib. 3. c. 16. mercatoribus ventos venales exhibent, tres nodos magica arte sacratos à loro pendentes eis offerentes: quorum primò solito vehementes, secundò vehementiores, tertio vehementissimos essent habituri. Mendaces, ut proverbio dicitur, linum lino, nodum nodo aectunt, ut nimis credulum induant laqueo. Initio paulo modestius orationis

Ddd 2

tionis

(d) *Mendacium comparatur vento.*

tionis vanitatem adhibent, & sermonem quasi aspergunt mendaciunculis: ubi sūdem nanciscuntur, impudentius erumpunt, & aures ac auras decumano turbine perflant. Et sēpē non sine pretio. Nam juxta Tacitum: *quis gratiō mendax est?* Nisi forte pueri, quibus volupe est mēdacia dicere, & fumos ac ventos etiam non licitantibus, non tam vendere, quām plenis buccis, velut Æolus, ex utribus afflare. Non æquē proclive est imbri de tegula cadere, quām huic ætati fingere, mentiri, fallere. In hoc planè, Erico Suecorum regi similes, de quo Olaus M. lib. 3. c. 3. memorat, eum in arte magica nulli suo tempore secundum, quocunque verteret pileum suum, inde ventos ad votum aspirantes habuisse.

IV. Vlyssis socii gustata loto, obliuiscuntur patriæ. Homer. lib. 9. Odyss. (e) *Lotum gustasti*, de iis dicebatur, qui diutiū peregrinis in regionibus h̄erent, veluti oblii reditū. Neque inconcinne dixeris in eos, qui simul atque semel voluptatem inhonestam degustarint, ad pristina studia revocari non queunt. Vlyssis comites degustata apud Lotophagos Africæ populos, lotō, redire ad navim noluere, nisi verberibus adacti. Plinius lib. 13. c. 17. scribit, loton esse arborem, pyro similem, folio quercino, fructus ejus instar fabæ, colore croci, singulari dulcedine ac sapore, ita ut ea, quæ in Africa nascitur, advenas inescare feratur. *Epicurei* fuerunt hi Vlyssis socii, qui sumnam voluptatem in corporis voluptatibus constituere.

Et quibus in solo vivendi causa palato est. *Iuvén. Sat. 11.* Hos Aristophanes *cadavera* collo tenus appellat. Huiusmodi vivum cadererat Caligula, qui se pro Jove Latiali adorandum exhibuit, templum suo Numini condidit, sacerdotes & excogitatissimas hostias instituit, quales erant phœnicopteri, pavones, tētraones, gallinæ numidicæ, phasianæ, &c. Quām multis templum est culina, sacerdotes coqui, hostiae cūpediæ variæ generis! Gulosorum imaginem expressit Alciatus Eml. 90, per virum, cui

Pinguis aqualiculus propenso sesquipedē extat,

Uit canit Persius Sat. 1. collum ei gruis tribuit, dextrâ larum seu gaviam, avem voracissimam, sinistrâ onocrotalum, pariter ingluvie infame, tenenti: alludens ad Philoxenum qui collum gruis, & ad Melanthium Poëtam tragicum, qui olorinum tibi optavit. Quid mirum, quod huiusmodi Lotophagorum mens depressa humi, totaque cum corpore projecta in pabulum, nulla virtutis, nulla cœli, patriæ beatæ cupiditate tangatur,

(e) *Epicurea voluptas.*

